



наведи телефон

# Луимә СЭрипос

26.02.2026  
№ 4 (1358)

www.khanty-yasang.ru

Основана 11 февраля 1989 года

E-mail: gazeta@khanty-yasang.ru

## Рётың юсвой этнос 23 хөталэ – хум хөтпат янытлан хөтал!



К. Лукачёва кетум хури

Ты хурит Ханты-Мансийск үст блнэ мәнлат пыг Александр Лонгортов пöслым блы. Тав мөлты тәл туи порат армиян тотвес. Ань Санкт-Петербург үс ляпат лусыты. Мәнлат пыг бвылтыт потыр 8 лөпсыт ловиньтән.

<b>Ты номерт ловиньтән:</b>	Кәсың мир такви ләтңе вос янытлытэ ▶ 2	Ханищтан хөтпат атхатыгласыт ▶ 4	Аквьёт ёсал хәйтсыт ▶ 7
Опарищ наме мир янытыл вәве ▶ 10	Хөнтлум хумыг урыл потыртасыт ▶ 11	Мәнй пәвлытын ялантаңкве эри ▶ 12	Тав округ мирн номуңкве патаве ▶ 15

# Кәсың мир такви ләтңе вос янытлытә

**С**оветский ўст щән ләтың янытлан мәгыс тынакт фестиваль вәрыглавес, руц ләтңыл тох намтым блыс: «Язык – душа народа». Та ўст нәпак ловиньтан колт рүпитан хөтпат тән ты ялпың хөтал вәрыгласыт. Тув сәв пәлыл мүй мәхум вөвинтасыт.

Ханты-Мансийск ўсныл «Торум Маа» музей рүпитан хум Вячеслав Кондин рётың ювой этпос 19 щислат Зеленоборск ос Коммунистический пәвлыгн тотыглавес.

Вячеслав Юрьевич нъяв-рамыт мәгсыл «Сказки волшебного сундучка» ос «Музей на ладони» программе суссылтас. Тот тав ханты ос мәнщи мәхум ёнгынутыт урыл потыртас, суссылтас, хумус нъяврамыт ёнгалтавет.

Галина Кондина мән-лат агит-пыгыт ханищ-тахтын Советский политехнический колледжин ялыс, тот мәнщи ләтың урыл потыртас. Тав 2022 тәлт «Маленький принц» мөйт-потыр мәнщи ләтңыг толмашластә, ос таве «Мән хөнкве» нәпакыг тәратастә. Колледжит ханищтахтын агит-пыгытн

тав потыртас, хумус мө-вит ўргалаңкве эри, ты нәпакт мөк эрнә ләтңыт хансым өлэгыт.

Мөтыт хөтал әлпыл Светлана Динисламова, филология наука кандидат нә, Советский район библиотекат диктант ловиньтас. Тув мәхум мәнщи ләтңыл потыр хансуңкве ёхталасыт. Ты тәл А.М. Конькова ос Г.К. Сазонов «И лун медлительных поток» потрөныл диктант хасвес.

Библиотека-колн потыр хансуңкве туп мәнщи нәт ёхталасыт, тән халанылт мәнлат хөтпа щар әтим блыс.

Тувыл А.Н. Семёнов, педагогика наука доктор нам өщнә ойка, нъяв-рамыт ос мәнлат агит-пыгыт мәгсыл лекция ловиньтас. Тав Мария Вагатова (Волдина) хан-



В. Кондин нъяврамыт ёнгалтыянә

сум стихыт, мөйт урыл потыртас. Хумус тав нәтнәг хансуңкве хәсыс, хумус сосса мир өлупса потранәт хұлтыстә. Аквта нъяврамытын Светлана Динисламова пәс мәнщи ләтңыт урыл потыртас, ань ты ләтңыт хот-ёрув-лаңкве патвөсыт. Сәвың-пәлә ань аты вәвет.

Валентина Пашанина, Октябрьский район Шеркалы пәвыл музей кұщай нә, Наталья Крюкова хансум нәпак урыл потыртас. Наталья Владимировна такви тот өс блыс, ос тән «Сердне-обские ханты – это мы» нәпак урыл аквөт потыртасыг. Нә өлнәтә палытыл такви рүтанә ос пәвлың мәхманә акв нәпакн хасанә, хотьют хумус рүтыг блы. Тув пуссын ханты өпарищ намыт хансыс. Хоты пәс рүтаныл вәй-вөсыт – пуссын нәпакн хасанә. Татем ёмас нәпак тәратамыт, хурил вәрманыл, таве сунсыг-лым ань өлнә хөтпат тәнти рүтаныл урыл вәңкве патәгыт.

Валентина Фанова, Октябрьский районный центрыт рүпитан нә,

Г.С. Райшев урыл нәпак тәратастә. Ты нәпаке тох намтыстә – «Вселенная талантов», тот хурит пөслам хум өлупсатә ос тав хуриянә урыл хансым блы.

Нәпак ловиньтан колт Анна Зайцева кәтыл пөслум хуриянә суссыл-тавөсыт. Ты хурит урыл нә такви потыртас, маныр тавән пөслуңкве мұсты ос манрыг тох пөслы. Тав хуриянәт сәв нәтнә лүп-тат пөслым өлэгыт, тав мө-вит туи порат пөслы. Хуриянә сака нәтнәг тә-лэгыт, тәнаныл сунсыглаңкве пұмыщ блыс.

Советский ўс библиотека кұщай нә Энже Бекташева ос тав мәхманә татем ёмас ялпың хөтал вәрыгласыт. Яныгхөтпат нъяврамыт ос мәнлат агит-пыгыт мәгсыл сәв-сыр ёмас вәрмалит урыл потыртасыт, тәнаныл ханищтасыт. Колледжит ос школаханищтахтын нъяв-рамыт пұмшалахтым тот ёмыгтасыт, сунсыглах-тасыт, ханты ос мәнщи ёнгынутытыл өщатахтыг-ласыт.



Колледжит ханищтахтын агит Г. Кондина ёт

Галина КОНДИНА

## Сосса мэхум потыр хассыт

**Х**анты-Мансийскат «Төрүм Маа» нампa музейт 18 хөталэт үст өлнэ сосса мэхум щань лятңыл диктант хассыт. Тамле тэла округувт касың тэл рётың юсвой этпос 2016 талныл вәруңкве патвес, тав щань лятңыт мирхал ялпың хөталэ кастыл вәрыглаве.

Ты талт диктант хаснэ тэла мөйтыт хансум хөнтаң мәнщи эква Анна Митрофановна Конькова 110 талэ төвлын кастыл ос ханты учёный эква Евдокия Андреевна Нёмысова 90 талэ төвлын кастыл щёпитавес.

Тынакт А.М. Конькова «И лун медлительных поток» хансум руц потре акв мән охсатэ мәнщи ос ханты лятңыт толмашлавес. Югра 2026

тэл мәншат мэхум щёмьяг намтнэ тэл магыс тот өс Картин щёмья өвылтыт потыртэгыт.

Ань музейт диктант мәнщи лятңыл лов хөтпа хассыт, ханты лятңыл – сятхуйплов хөтпа. Мәнщи лятңыл потыр Татьяна Мерова ловиньтастэ, ханты лятңыл – Раиса Решетникова. Таи ёмас, ань сосса мэхум коньпал тамле диктант хансуңкве мөт хөтпат өс



Щань лятңыл потыр хансум хөтпат

пүмшалахтэгыт ос тув ёхталэгыт. Тох руц нэг Ксения Гресь ос Елена Иваненко мәнщи лятңыл хассыг.

Хансум тэла юи-палт

тув ёхталам хөтпат пуссын Ас-угорский мэхум интитутт палыл щёпитым сертификат нэпакыл майвёсыт.

Тамара МЕРОВА

## Ам мирум щань лятңе



Акван-атхатыглам мэхум

**А**квта хөталт ДЭКОЦ колт «Ам мирум щань лятңе» («Язык народа моего») намаим ёнта пасан ватат потыртан нак өлыс. Тув Ханты-Мансийск үст ныврамыт ханты ос мәнщи лятңыл потыртаңкве ханищтан хөтпат ос мөт мүй мэхум атыглавёсыт.

Тан ётаныл кўчай нэ Надежда Казначеева пащалахтас ос щань лятңыт мирхал ялпың хөталыл янытласанэ.

Ёнта пасан ватат өвлэт общественный связьтэлат ёт рүпитан хум Андрей Макаренко потыртас. Тав үсувт маньр вәрмалит

өлыглэгыт, таит осн-паттысанэ. Округувт хумус щань лятңыт ханищтавет, ты урыл Ирина Молдана, Наталья Величко ос Ольга Норова потыртасыт.

Хөт ос хунь мән ныврамаквет мәнщи ос ханты лятңыл, пёс накыт пүмшалаңкве патвёсыт, ты өвылтыт «Незнайка» нампa колт рүпитан нэ Ирина Литвинчук потыртас ос ты элы-палт акв нётнэ эрыг эргыс. Тав Ханты-Мансийскат өлнэ сосса мэхумн тавён нётмил вәрнэныл магыс пүмашипа латың лавыс.

Тувыл мөт мәныл ёхталам нэг рүпитанэн сака пүмшалавёсыт. Ты Советский үсныл ёхталам нэ Татьяна Спасенникова, тав «Ромашка» нампa ныврам үрнэ колт рүпиты ос Белоярский район Касум павылныл ёхталам

нэ Софья Каксина школат рүпататэ урыл потыртас. Тэн сас ныврамыт ханищтан порат сыре-сыр пүмыш накыт щёпиталэг, ныврамыт ёт ёнгёг. Ань хурит суссылтасыг ос ёнгысыг.

Савсыр хащтал лятңыт хумус ханищтаңкве рөвёгыт, ты өвылтыт ЮГУТ рүпитан нэг Юлиана Крисальная ос Марианна Андуганова манап пүмшчаласыг. Тувыл мэхум лүль лятңыл нэмхөт ул вос лягалэгыт, тамле пищ хот вос ёрувлэгыт, ты өвылтыт «Союз Православных женщин Югры» тэла тармыл пуңкотнэ нэ Валентина Рашупкина потыртас.

Ань акван-атхатыглам хөтпат аквтох элалы нётхатым рүпитэгыт тах.

Тамара МЕРОВА

# Хаництан хөтпәт атхатыгласыт



**Э**лы мән павлың мат өлнэ ос рүпитан махум тэлы порат, хунь лёңхыт палыг-патэгыт, халанылт савсыр каснэ вәрмалит вәрёгыт. Тох рётың юссуй этпост Хулюмсүнт павылт Районный конкурс руц щирыл «Педагог года Берёзовского района – 2026» өлыс.

Каснэ магыс 22 хаництан хөтпә ёхталас, «Учитель года», «Воспитатель года», «Педагог дополнительного образования», «Психолог года» наманыл вуянтасыт.

Ты тал рётың юссуй этпос акваг ащирм ос вөтасың өлыс. Каснэ махум ащирманыл ат рохтысыт, Хальүсныл, Тэк павылныл, Восыңтүрныл, Кульпасныл, Ягримныл, Светлый павылныл, Няхщамвольныл Хулюмсүнт павылн атхатыгласыт, нила хөтал сыс тыт номтаныл-ваганыл арталасыт.

Хаництан хөтпаг өлуңкв, сөль, сав ёр ос ваг эри. Хаництан хөтпа – няврам эруптан мак хөтпа. Мак хаництан хөтпа касың няврам торгамтытэ, манкём няврам яныгми – тав өс аквагтох яныгы ёмты.

Каснэ хөталыт сыс хаництан махум хөтал палытыл рүпитасыт, мастер-классыт суссылтасыт, хаштәл няврамыт ёт урок хаництасыт. Касың хаництан хөтпа таквинәтэ арталас, хумыс рүпитанкв хасы, суссылтас. Жюри хөтпат касың хөтал



ёмщакв суссыт ос вёщкат щирыл учитель наманыл уртсаныл:

«Учитель года» нам **Светлана Сергеевна Полякова** вис, Ягрим павылт өлнэ Г.Е. Собянин нам өщнэ школат хаництан нэ;

«Воспитатель года» нам **Людмила Анатольевна Крылосова** вис, Светлый павылт өлнэ «Ветерок» мән няврамыт колт рүпитан хөтпа;

«Педагог дополнительного образования «Сымум няврамытын мыглум» нам **Сергей Сергеевич Сетов** вис, Саранпавылт «Центр «Поиск» колт рүпитан хум;

«Психолог года» нам **Татьяна Александровна Храмикова** вис, Ягрим павылт мән няврамыт ёт «Звёздочка» колт рүпитан хөтпа.

С.С. Полякова лавыс: «Яныг пумащип тыт рүпитан махмытын! Такем ёмщакв мән тыт өщвесүв, тыттувесүв, үргалавесүв. Хотталь нювумтэв, акваг китыглавёв, матыр нётуңкв ат эри. Мән тыт сома мәнки колувн юв ёхтысүв, сома щәнягүв-ащягүв палт ёхтысүв, акваг үргалым та өньщавёв. Мән тыт рүпитасыт ос үщлахтасыт, халувт хаництахтасыт. Касың хөтал ам сав эрнэ номт

тыгыл висум, юв ёхтэгум тыт хаництам вәрмалыанум Элалль тотуңкв патыянум».

Анна Васильевна Валей, история ос общество урокыт хаництан нэ, тав мощмолтынув Хулюмсүнт павылт учителяг рүпитас, ань Саранпавылт өлы, рүпиты. Тав лавыс: «Мак хаництан нэг өлуңкв ам ты школат хаництахтасум. Маныр ань вагум, маныр хасэгум, пуссын тыт хаництахтасум. Тыт рүпитан хөтпатын яныг пумащипа ләтың лавёгум, тән пуссын сома ам увциянум, каңканум, акваганум. Ам нананн сака эруптыянум!»

Хальүс район образование комитетт председателиг өлнэ нэ Вероника Васильевна Чекмазова өс ёхталас, хаництан хөтпат янытлас. Галина Владимировна Третьякова, ишкола директор нэ, хаництан хөтпаг өлнэ махум пуссын янытласанэ, Вероника Васильевнан янытлан ләтңыт лавыс, тав өс йилпи ишкола үнттым порат ләтңыл-вәрмалит нётыс. Тахольтыл ань Хулюмсүнтың няврамыт хаництан хөтпаныл ёт йилпи колт хаництахтэгыт ос мүй махмыт пирмайтэгыт.

**Анна АЛГАДЬЕВА**

# Мāньлат мāхум каснэ вāрмалы

**Р**оссия янытыл ханищтахтан мāньлат мāхумыт мāгыс касыл блыгы. Тав «Профессионалы» ос «Чемпионат высоких технологий» нам бньщи. Нōх-патнэ хōтпат тāнки блнэ мāныл суссылтэгыт, тувыл мāхумыт ёт касэгыт. Ты касылт Россия янытыл ханищтахтан мāньлат хōтпат халанылт касуңк вёрмёгыт.

Рётың юсвой эппост Югра мāt ханищтахтан мāньлат мāхумыт мāгыс каснэ вāрмалы блыс. Тамле тэла аквторыг Югра мāt блнэ ханищтан нёлолов колыт ёмтыс. Тамле колыт Советский, Сургутский, Когалымский, Нефтеюганский политехнический колледжит ос Междуреченский агропромышленный, Ханты-Мансийский технологического-педагогического колледжит, тувыл Институт среднего медицинского образования Сургутского государственного университета, Сургутский институт экономики, управления и права каснэ вāрмалы блыс. Тув округ янытыл сāvсыр специальностит акван-атвёсыт – пуссын аквёет 74 блыс.

Рётың юсвой эппос 13 хōталэт Сургут үст нōх-патум хōтпат янытлавёсыт. Тув кўцаит сāvсыр мāныл атхатыгласыт. Нōх-патум

хōтпат «ПАО «Сургутнефтегаз», ПАО «Ростелеком», ООО «Газпром трансгаз Сургут», Сургутский государственный университет ос «Умка» нампа нйврамыт ханищтан колт рўпитан хōтпат мўйлупсал мўйлуптавёсыт. Тувыл бвыл мёста вим хōтпат Югра мāv регионит халт суссылтыяныл, хотьютаныл нōх-паты, Россия янытыл касуңк патэгыт.

Ам каснэ вāрмалин ялум āги ёт потыртасум. Тав наме Даша Дунаева, Советский үст Советский политехнический колледжит нилыт курсыт тэнут вāрнэ хōтпаг ханищтахты. Сургут үст атың тэнут вāрнэ хōтпат ёт касыс. Тав кондитерский номинацият хўрмит мёста вис.

**Даша Дунаева** лāвыс:

– Ам сака кāсащегум атың тэнут вāруңк, таимāгыс каснэ вāрмалы урыл номсуңкве патсум. «Профессионалы» тэла рётың юсвой эппост 9-13 хōталыт блыс. Мāн сārтын щёпитахтуңкве бвылтахтасўв. Ам наставникум **Галина Михайловна Талдонова** блыс. Тав Советский колледжит ханищтан нэг рўпиты. Тав āнум сāvсыр атың тэнут вāруңкве ханищтастэ. Ты тэла элы-пāлт хōтпа пёриян вāрмалы блыс, тот ам элалы паттувёсум. Тувыл Сургут үсн касуңкве ёхтысум. Анумн лильпи вāрмалы āрталаңкве пўмыщ блыс. Касыл āнумн мўсты, сāvсыр заданият



Даша тэнут вāри

вāрсув. Ам «Опера» торт вāрсум, пўмыщ блыс.

Мāн рўпатав колледжит рўпитан экспертыт, индустриальный экспертыт ос кўцай хōтпат āрталасаныл. Ам ётум касум āгит щёпитахтым блсыт, пуссын нōх-патуңкве таңхасыт. Мāн акванюрщхатасўв, халанувт ёмщакв потыртасўв.

Тамле каснэ вāрмалит номсахтын хōтпан лāvёгум: āрталаңкве ул пилэң, ты ёмас тэла.

**Ханищтан колыт тасāвит мёталы бньщёгыт:**

Сургутский политехнический колледж – 36 мёталы (20 сōрни).

Советский политехнический колледж – 22 мёталы.

Сургутский институт экономики, управления и права – 19 мёталы.

Югорский политехнический колледж – 13 мёталы.

Нижневартовский социально-гуманитарный ос Когалымский политехнический колледж – 12 мёталы.

Ты вāрмалы специальностит элалы тотнэ мāгыс Россия янытыл блы. Тувыл нōх-патнэ ханищтахтан мāхумыт мōт регионит халт элалы касуңкве патэгыт. Ётыл тах Россия янытыл тāнки блнэ мāныл суссылтыяныл.



Советский политехнический колледжит ханищтахтан мāньлат мāхум

**Галина ДУНАЕВА**



Д. Ульянов потырты

## Хурит пöслыс ос потрыт хансыс

**Р**ётың юсвой этпос китхуйплов хөталэт Ханты-Мансийск үст катыл хурит пöслум хум Владимир Александрович Игошев музей-колэт сав мэхум акван-атхатыгласыт. Тот суссылтап щёпитавес, руц щирыл ты вәрмалы «Северный путь» лававе. Ты ойка пёс порат лүймән вәтихал ёхталас, тыт тав налыман арыгтем хурит пöслыс.

Музейкүщай хум Денис Ульянов лавме щирыл, ты музей 2001 талт Ханты-Мансийск үст пүсвес. Ты выставка касың тал щёпиталаве. Ань тот ати туп музейт рүпитан хөтпат акван-атыглам хурит касалаңкве рөви.

2022 талт ойка пöслум хуриянэ акв коллекционер хум Владимир Ильич

Некрасов ты музейн мисанэ. Ты хосыт тот ань савнун хури ёмтыс. Ты тал Владимир Игошев яныгсат ат талэ төвлүнүв. Ты кастыл музей-колт йильпи хурит тагатавёсыт. Ты нётнэ хурит касың хөтпа сунсыглаңкве вөрми.

Владимир Александрович мән округувн

1957 талт вөввес. Аквта тал мәнполь этпост хум тыт та ёхтыс. Төнт тав түйт хосыт сәлың суныл миннэ сосса хөтпа өвыл щёс касалас. Ты нётнэ вәрмалы тав сымән сака мұстыс. Та пәсныл хум лүймән вәтихал ёхталаңкве патыс, тыт тав сосса мэхум урыл савсыр хурит пöслыс.

Катыл хурит пöслум хөтпа сосса мэхум йис мät өлме порат, ләщал мәнщитосхантытөлупса, щәнь ләтың ос өлнэхүлнэ накыт ханищтас. Төнт тав яныгпала хөтпат ос нйврамыт акв щирыл үнлын хурит пöслыс. Тувыл мэхум матыр рүпата вәрнэныл торыг хурит вәрыс. Касың картинанэ нётнэг тәлсыт. Владимир Игошев лүймät өлнэ мэхум хурин пöслуме мәгыс мирн вәңкве патвес. Ты рүпататэ мәгыс тав

мәщтыр намыл пинвес.

Владимир Игошев хурит пöслуме коньпал стихыт ос потрыт хансыс. Тав мән округувт өлнэ сосса мир өлупса урыл сав потрыт нәпакын хансыс. Ты потранэ өс музейт өньщавет. Тувыл ювле хультум нотыт онтырсат талытт лүймät яласама урыл кинан пöслувес. Ань Любовь Павловна Корнеева ты кина өс музей колн мистэ. Хунь ты кина суссылтаңкве патаве, мэхум вөвавет тах.

Владимир Игошев Башкортостан мät Аскино павылт 1921 талт самын патыс. 1940 талт тав Уфа үс театрально-художественный вәрмалын ханищтахтас, әстламе юи-пәлт тәра хөнтлын мән кётвес. Мәнлат пыг мав үргалым тәкыщ ос пилтәл хөнтлыс. 1942 тал ойгпаме элы-пәлт нялын тәкыщ сакватавес. Акв тал пүльницат пусмалтавес ос юв кётвес. Хум акваг лавыглас, тав лүймät өлме ос рүпитама мәгыс янытэт пусыг ёмтыс.

Владимир Игошев 2007 талт атимыг ёмтыс. Мэхум тав пöслум хуриянэ сунсуңкве музей колән вәтихал ялантёгыт. Ты выставка тал палыт рүпитаңкве паты. Мэхумаквет, нән өс тув ялән.

Николай МЕРОВ

[www.khanty-yasang.ru](http://www.khanty-yasang.ru)



# Аквѣт ёсал хайтсыт

**Т**ы этпос 14 хөталѣт Ханты-Мансийск үст ёсал хайтнэ вармаль блыс. Ты тѣла Россия янытыл касың тал ёмталы. Руш латңыл «Лыжня России» нам бныщи. Ты тал 44 щѣс вѣрыглавес. Тув аквѣт рүпитан хөтпат, щѣмьят, няврамыт, мѣнылат хөтпат, яныг элумхбласыт, тувыл ёсал хайтуңкве кѣсащан мѣхумыт ялантѣгыт. Югра янытыл 16 сөтыракем хөтпат хайтсыт.

Ты касыл порат «Этнозабег» блыс. Ты вармаль касың тал вѣрыглаве. Тув Югра мѣныл кѣсащан мѣныщи ос ханты хөтпат сѣвсыр пѣвлытныл, үсытныл ёхтала-сыт. Тѣн мѣныщи ос ханты маснутыл масхатым 500 мѣтра хайтсыт.

Округ кўщай хум **Руслан Кухарук** тох лѣвыс:

– Россият олнэ мирыт акван-юрщхатнэ тѣлыт мѣн ты пѣс вармаль элалыт тотуңкве номылматсўв. Ань ты касыл Югра мѣт «Лыжня России» порат ёмтуңкве паты. Тамле тѣлат сѣв мирыт халанылт юрщхатым блуңкве нѣтѣгыт.

Лүимә мирыт пѣс тѣгыл ёсаныл патта котыл вѣрияныл. Тувыл вѣраян ос сѣлы үрнэ хөтпат ёсал вѣрта ёмыгтѣгыт.

Ты блум касылт хум хөтпат халт бвыл места **Руслан Богордаев** вистѣ. Тав ханты хум, Ханты-Мансийск үст блы. Тав ёсал ты вармалит акваг хайты. Тувыл «Охотничий биатлонит» китыт щѣс нѣх-патыс. Хум тохлѣвыс:

– Ёсал вѣрт ос соревнованият акваг хайтѣгум. Таимѣгыс нѣх-патуңкве вѣрмысум. Мощ



*А. Зверева, Е. Цуркан, Р. Гаврильчик*



*Олеся ос Леонид Тэвлиныг*

тѣрвитың блыс. Сургутский ос Нижневартовский районныл ёр нѣт ос хум хөтпат ёхтысыт. Пуссын щѣпитахтым ос номтыңыг блсыт. Мѣхумытна лѣвѣгум, тамле вармалитын ялантѣн! Тыт тѣсавит мѣхум рѣви кѣсалаңкве. Тѣсавит мѣхум, хотьют пустѣгыл блуңкве таңхи. Ам номсѣгум, ты сака эрнэ тѣла.

Китыт мѣста **Леонид Тэвлин** вистѣ. Тав тыг Русскинская пѣвылныл касуңкв ёхтыс. Леонид ханты хум, сѣлы үрнэ хөтпа. Пѣс йис вармалит щирыл блы. Хум тох лѣвыс:

– Ам спорт эруптѣгум, хунь щѣс бныщѣгум, хайтыгтѣгум. Тамле ялпың хөталн бвыл щѣс ёхтысум. Овлѣт ат вѣслум

мансѣвит мѣтра хайтуңкве эри. Анузн шар мѣк таи–нас тыт мѣхумыт ёт хайтуңкве. Сака ёмас тай тѣсавит хөтпа ёсал кѣсалаңкве.

Ос хўрмит мѣста **Константин Никонов** вистѣ. Хум хөтпат халанылт шар мѣн пыг касыс, тав наме Георгий Ткачук, иң ишколат ханищтахты.

Нѣт халанылт **Алёна Кунина** нѣх-патыс, тав Нефтеюганский районт блы. Китыт мѣста **Олеся Тэвлина**, Русскинская пѣвылт Сургутский районт блнэ ханты нѣ, вистѣ. Тувыл хўрмиттыг **Раиса Гаврильчик**, Ханты-Мансийск үст блнэ нѣ, ёхтыгпас.

Раиса Гаврильчик ВГТРК «Югория» ос «Лылың сѣюм» колт

рүпиты. Тамле вармалит тав сѣв тал касы. Раиса Мартыновна «Лыжня России» ос «Югорский лыжный марафон» касылыт акваг рѣви кѣсалаңкве. Тав тох лѣвыс:

– Анузн ёсал тахсуңкве, ёсал хайтнэ нѣ хольт арталахтуңкве сака мўсты. Ам вѣраян хум ѣги. Вѣраян щѣмьят яныгмасум, ѣщум вѣраян хөтпаг блыс. Ты тал сѣв мѣнылат мѣхум кѣсала-сум. Анузн таи сака ёмас, тѣн сѣвсыр районитныл ёхтысыт: Нижневартовский, Сургутский. Тувыл кѣсың тал вѣраян ёсал хайтнэ мѣхум акваг та сѣвми. Тыхөтал сака сѣв нѣквет нѣглысыт, ам ос амки ёрум арталаңкве таңхилум. Этнозабег – сака ёмас вармаль.

Каснэ тѣла юи-пѣлт мѣхумыт янытлан мѣн вѣввѣсыт, мѣталит май-вѣсыт. Тѣн пуссын ёмщакв янытлавѣсыт, мўйлупсал мўйлуптавѣсыт.

Этнозабег вармалит Югра мѣт блнэ сѣсса мирыт вѣрмѣгыт хайтуңкве. Мѣтыт щѣс касѣн. Ты ёсал хайтнэ пўмыщ ос эрнэ тѣла.



*Сѣсса мѣхум округ кўщай Р. Кухарук ос мўй хөтпат ѣт*

**Галина ДУНАЕВА**

# Салтат пыг ляпа рутанэн юв ураве

**Х**анты-Мансийск үст блнэ мәнълат пыг Александр Лонгортов мōлты тāl туи порат армиян тотвес. Ань тав Санкт-Петербург үс ляпат лусыты. Тав ома тэ Клавдия Ильинична Лукачѐва, такви бпарищ наме Алгадьева – мәнъщи нѐ. Аятя тэ Андрей Иванович Лонгортов – ханты хум. Клавдия Ильинична пыге урыл мәнъщи газетав мĀгсыл таи потыртас:

– Александр пыгум 2005 тālт яңк нātнэ этпос хұрмит хōталēt самын патыс. Гимназия №1 онтолов класс āстлас. Тувыл Югорск үст политехнический колледжит электромонтѐрыг нила тāl ханищтахтас.

Мōлты тāl лұпта этпос оигпан элы-пālт диплом-нѐпаке вуянтастэ ос китыт хōтал тāра Югорск үсныл армиян тотвес. Ханищтахтам юрт пыганэ эт Пыть-Ях үсн пуссын минасыт ос тот лāкквартвѐсыт, ѐтыл Россия янытыл хотальāи кѐтвѐсыт. Александр ос акв юрт пыге ѐт Челябинск үсн тотвесыг.

Ань армият блнэ пыгытн сāt хōтал сыс акв щѐс телефон щирыл рутаныл

ѐт потыртаңкве рōви. Тōнт Александр лāвыс, вōртур этпост присяга тах ѐмты. Ам ўщлахтын хōтал висум ос Челябинск үсн тав палтэ минасум. Вōртур этпос нѐлоловит хōталēt Александр мōт пыгыт ѐт ты присяга ловиньтас. Тōнт мәнълат пыгыт оманыл-āтяныл Россия янытыл тув ѐхта-ласыт, мир сака сāv блыс.

Югорск үст блме порат тав водителиг ханищтахтас ос тувыл нѐпакыл майвес. Челябинск үст ханищтахтын центрты яныг мāшинал яласан хōтпаг элаль ханищтахтас.

Мāнь таквс этпост Александр мōт мāн кѐтвес. Ань тав Санкт-Петербургу с лѐпат тот блы.



Александр присяга ловиньты

Пыгум лāви, тот хōнтлын нак урыл потыртавет, писалил пātлуптаңкве ханищтавет.

Мōлты тāl таквсы Галя увщим Санкт-Петербургу үст Ирина āгитэ палт мўйлыс. Тэн аквѐт Александр палт ялсыг. Тав такем щāгтыс, хаштāl мāt ляпа рутанэ кāслаңкве тай сака ѐмас. Ань туи мус тот лусытаңкве паты.

Александр ома тэ Клавдия Ильинична Ханты-Мансийск үст мир нѐтнэ колт рупиты. Сāv нѐврамың щѐмьят, яныг-пāла хōтпат, нуса тотнэ


хōтпат сāvсыр пособие олн винэ мĀгсыл нѐпакыт щѐпитаңкве нѐты. Ос үст блнэ мәнъщи, ханты, ѐрн яныгпāла хōтпат намхōталыл янытлаңкве юв яланты.

Александр эще Анастасия Ханты-Мансийск үст 11 класс āстлас. Ань Тюмень үст университетыт филологыг китыт курсыт ханищтахты.

Мәнълат пыг ляпа рутанэ Хālьўс район Хулумсўнт пāвылт блѐгыт. Александр мāниг блме порат кāсың туи тāн палтаныл ўщлахтуңкве ялантас. Хурум этпос сыс рūt мāхамнэ палт блыс. Пыг вōрт яласаңкве, пил вātуңкве, лāхыс атуңкве ос пāкв паттуңкве, няс-луңкве сака эруптас.

Александр лұпта этпост юв тах ѐхты. Тав лāвыс, моц ўщлахты, рутанэ палт Хулумсўнт пāвылн ялы ос тувыл рупитаңкве патхаты.

Мәнълāt пыг рūt мāхамнэн паща лātңыл кѐтаве. Александр ѐмас номтыл, ѐрыл вос пинаве. Нāй-Отыранэн акваг вос ўргалаве!



Ома тэ ос яглаңе ѐт



Галина āкве ос Ирина āңквāгитэ ѐт

Людмила ТЕТКИНА

# Хум мәнъщи ләтңыл эрги

**М**ощ мблалнув мәнъщи хум Евгений Анямов ёт хонтхатыгласув. Тав Ханты-Мансийск үсн рупитаңке ёхтыс. Хум мәнъщи ләтңыл «РЭП» нампа эргыт такви хансы ос эрги. Тав ань хот яласас, мансәвит эрыг хансыс ос такви блупсатэ урыл мәнәвн мощ потыртас.

Евгений Свердловский область Сәпса (Ивдель) үст 1996 тәлт самын патыс. Тав нёрыт ляпат Кёрасколыңъя пәвылт яныгмас. Пәвыл мәхум пуссын мәнъщи ләтңыл потыртасыт, тымәгыс тав мәнъщи ләтың ёмшакв вәгтэ. Ань та пәвылт нәмхотьют ат блы. Хосатнув ляпат блнэ Ушма пәвылт йильпи колыт үнттувёсыт, мәнъщит пуссын тув вәнтлысыт.

Пыг школан минаме мус руц ләтңыл потыртаңке ат хәсыс. Тав Полуночный пәвыл школат ханищтахтаме порат интернатывт блыс. Тонт Нёр ляпат яныгман мәнъщи нйврамыт ханищтахтуңке пуссын тув тотыглавёсыт. Түяг, таквсы ос туи порат пуссын нйврамыт уцлахтуңке машинал юв тотыглавёсыт. Тав тот онтолов класс әстлас.

Евгений акваг Нина

анёкватэ палт Кёрасколыңъя пәвылт блыс, тот яныгмас. Оматэ Мария Алексеевна Анямова турманколт үнлын мәхум уральтым рупитас, юн мёрсың порат блыглас. Тувыл та турманкол лаппантвес, Мария Алексеевна пөхын кётвес.

Та юи-пәлт нэ Владимир Пакин хумитэ ёт Пума пәвылн олмыгтас. Аквматнакт экваг-ойкаг вөрн сүйпил вәтуңке минасыг. Тонт нэ клещ кёрыңхомлахын төвмувес. Ты паттат тав алпитэ исыглас ос пуңке агмыл ёмтыс. Нэ тәра Александр мән нйвраме ёт Сәпса үс пүльницан тотвёсыг. Пусмалтахтаме юи-пәлт тав мәнъ пыге ёт Сәпса үст вәнэ хотпанэ колн эт хулуңке минас, нэ пыге ёт тот ёл-хуяс. Та халт ос мот хум хотпат та колн ёхтысыт ос алхатуңке патсыт. Ты паттат кит хумыг касаил тұцту-



Эргыт хаснэ колт



Евгений яныг үст кон мәнъщи эргыт эрги

вёсыг. Мария Алексеевна ты нак урыл нәмхотьютын ул вос ләвыс, ос порславес. Ты нак 2010 тәлт ёмтыс.

Мария Алексеевна нйврамаге Ушма пәвылт рутанән янмалтавёсыг. Лёль нак ёмтум порат тав ётэ олум мәнъ пыге Александр хот тәлэ яныт блыс. Тав ос школа-интернатт ханищтахтас. Ань тав Николай Анямов сасге палт Ушма пәвылт блы. Тән аквьёт мәхум уцлахтын турбазат рупитэг.


Ты тәрвит блупсатэ урыл Евгений ань мәнъщи ләтңыл эргыт хансы. Маныр блыс, ты тәлат пуссын сым кйврёт бньщиянэ. Тав ләви, хунь ты вәрмалит эргиянэ, эрың, тавән мощ күпни-

тыг ёмты. Тав сака кәсащи, мәхум тав тәрвит эрганэ вос хунтамланувыт ос тамле накн нәмхотьют ул вос патнув.

Ань Евгений Анямов Ханты-Мансийск үсн ёхтыс, тыт «ЕвроСтрой» ләпкат тыналахтын хотпаг рупиты. Уцлахтын хоталыт порат мәнъщи ос руц ләтңыл эргыт хансы.

Ань хонтлын хотпат таве хонт нак урыл руц ләтңыл эрыг хансуңке вёвсаныл, тымәгсыл олн ойтуңке ләвсыт. Тав ань тән уранылт эрыг хансуңке щёпитахты. Ханты-Мансийск үст блнэ акв ёмас хум Евгений эрганэ ёл-хансуңке нёты. Ты йильпи альбоме тав студия колнакёт хансытән тах.

Николай МЕРОВ



Мәнъ Женя оматэ ёт



Нина анёкватэ ёт

# Өпарищ наме мир янытыл вāве

**М**ā янытыл Калашников өпарищ нам сāv мирыт халт вāве. Тамле өпарищ нам Михаил Тимофеевич, писалит вāрум хум, мирн вāнэг ёмтыс. Тынакт Ханты-Мансийск ўст ёлнэ «Мā-вит ос Элумхёлас» музейт «Легендарный Калашников» нампа суссылтап пўсвес. Тыг сāvсыр писалит ос хурит Ижевск ўсныл «Музейно-выставочный комплекс стрелкового оружия имени М.Т. Калашникова» тотвёсыт.

Тананыл мāхумн суссылтан элы-пāлт МВД России ос Югры симфонический оркестр хонт эрыгсовыт ёнгыс ос тувыл кит мāнь пыгрищиг писаль лāкква-пиным шаңкванэ суссылтым молях акван-атсанэн.

Ты проект – āти кос писалил пāтлуптан тэлат урыл. Тыи акв яныг элумхёлас ёвылтыт, тав ёлупсатэ ос номсахтым вāрум утанэ урыл. Михаил Тимофеевич Калашников Россият ос мёт мāt мирн вāве. Россият писалит Ижевск ўст хосат тāгыл вāравет, ань та музейныл ёхтум хётпат ос мёт мўй мāхум потыртасыт.

Ёвлэт мāхум ёт «Мā-вит ос Элумхёлас» нампа музей кўщай хум **Иван Яшков** пащалахтас, тав лāвыс: «Мāн тамле суссылтап щёпитанкве округ миркол пāлыл «Гастроляная карта Югры» программа хосыт нётвесув. Ты хосытыл музейт хоталь-āти тāнки пўмыщ пормасаныл сāvсыр мāн тотыглаңкве ос тот суссылтанкве вёрмияныл. Кос выгўв, инженер-конструктор Калашников вāрум писалянэ хосытыл ань Россия мāв акваг ўргалым ёньщилўв ос хонтлын порат акваг эрёгыт. Мāн халувт ань СВО мāн ялум кит хум хётпаг ёлэг, ам тэнатэн лāтың лāвуңкве вёвиягум.»

**Павел Русин**, подполковник, орден Мужества ёщнэ хум, таи потыртас: «Ам нāн музейн пўмашипа лāвёгум. Ты суссылтап сунсым сāv мāхум Михаил Тимофеевич Калашников урыл вос вāгыт. Мён Алтайский ёр Курья пāвылт самын патум хётпаг. Михаил Тимофеевич мāнь порат стихыт хансуңкве таңхыс ос хонтлын мāныл юв ёхтуме юи-пāлт, писалит вāруңкве патыс. Ты элумхёлас инженерный образование ат ёньщис кос, ос кāсың сālтат такви мātэ мāкыг вуюнтаңкве вос вёрмыс, тав эрнэ автомат щёпитас.

Тав вāрум автоматанэ мёт хон мāt ёлнэ мирытн вāвет ос хурахлэгыт. Мāн хонтлум хум хётпанув Калашников автомат кāтын ке выганыл, тāн пилтāлыг хонтлуңкве минэгыт.»

Юграт ёлнэ хум, орден Мужества ёщнэ хум **Руслан Вахитов** тох потыртас: «Ам яныг суиң нам ёщнэ элумхёласн яныг пўмашипа лāвёгум ос тыт тав урет суссылтап щёпитым мāгыс щāгтэгум. Кавказ Лүймātэт хонтлынёв порат тав вāрум пулемётэ, автоматанэ хосытыл мāн мāв мўсхалыг вуюнтаслўв. Тот кос вущлахың манос сэйиң мāt, тāн ётаныл нэмат лўль ат ёмталас,



Няврамыт писалит пўмщалэгыт

эрмыглан торыг аквписыг пāтамтэгыт. Ань ты пора хонтлын накыт аквтох, АК-74 сака ёмас писаль, мā янытыл воссыг нэмхотють тамле ут ат вāрыглас, ат ёньщи.»

Тувыл М.Т. Калашников нампа музейт рўпитан нэ Лада Михайловна мўй мāхумн конструктор ёйка ёлупсатэ урыл потыртас, хурит ос писалит суссылтас. Ты коньпал хота мус хот-гўйтнэ нэпакыт тыг тотвёсыт ос осн-паттувёсыт, тувыл хонтлын порат ёмталан сāvсыр накыт ёс номылматыглāлвёсыт.

Мётыт колнакт «Пла-

нета Михтим» суссылтавес. Нāн вāглын ман āти, «Михтим» – тыи Михаил Тимофеевич Калашников ёвлэт тамле нам такви вāрум утанэ палт хансыглас. Ань физика сāкконыт хумле ёлэгыт ос сāvсыр пормасыт хосыт хумус рўпитэгыт, ты урыл Геннадий Пушин мāхумн потыртас.

Ты суссылтап Ханты-Мансийск ўст нила этпос иң рўпитаңкве паты. Матыр-āти пўмщалан тэлат нāн музейт рўпитан нэ Лариса Поршунова китыглаңкве вёрмегын.

Тамара МЕРОВА

# Хөнтлум хумыг урыл потыртасым



*А.Н. Брусницин ос Р.Г. Решетникова*



*Т. Решетникова, С. Конева*



*Аня Куликова*

**Х**анты-Мансийск үст рётың юсвой этпос 13 хөталэт «Лылың сёюм» нъяврамыт ханищтан колт «Судьба человека в истории народа» нампа суссылтап олыс. Ты вәрмаль онтолов щёс вәрыглавес. Ань 1941-1945 тәлыт мәхум яныг хөнтлум вәрмаль 80 тәлэ ос Отечество вуянтан тәл кастыл акван-хөнтхатыгласыт.

Ханищтан колт рүпитан нэ **Светлана Конева** мүй мәхумыт мәгыс ләтың ләвыс:

– Мән щәгтым олэв нанан тыт кәсалаңкве. Тыхөтал ёмтым вәрмаль эрыг щирыл «Жизнь – только миг между прошлым и будущим» ләвыслув. 2025 тәл Победа хөтал 80 тәлэ төвлум ос Отечество вуянтан тәлыг олыс. Ты яныг тәлыг акван-олтым олэг. Мән пёс рүтанув вәрум тәла мәнлат хөтпат вус номияныл.

Ты вәрмаль хөнтлум мәнщи ос ханты хумыг урыл вәрыглавес. Суссылтап овыл пәлэт хөнтлум хум Анатолий Брусницин потыртас. Суссылтап китыт пәлэт Раиса Решетникова пыге Александр Решетников урыл потыртас. Тав хөнтлын мāt порславес.

Анатолий Брусницин мәнщи хум. Тав «Төрүм Маа» музейт сака кәркамыг рүпиты. Сәв пёс йис пормасыт вәруңкве хәсы, суссылтапыт порат нъяврамыт матыр-әти вәруңкве ханищтыяна.

Тав Вячеслав Кондин ёт «Разбудит нас с тобой май...» нэпак хансыс. Тот хөнтлын пора урыл стихыт хансым олэгыт. Анатолий ләвыс, хунь номылматас стихотвореният хансуңкве, мәхумыт элыпәлт ловиньтасанэ.

**Анатолий Брусницин** тох ләвыс:

– Ам хөнтлын мән минуңкве хосат тәгыл номсасум. Тувыл хунь мәнлат пыгыт тув минасыт, ам акваг номсахтуңкве патсум. Военкомат колн кит щёс ялсум. Ётыл хунь хөнтлын мāt олсум, акваг щёмьям урыл номсысум. Мән 1941-1945 тәлыт хөнтлум мәхумыт ёт потыртасүв. Тувыл вәслув, хумус тән олсыт. Тән акваг мәнавн потрыт потыртасыт. Ам номсэгум, тай шар мāk олыс.

Суссылтап китыт пәлэ Александр Решетников урыл олыс. Тав хөнтлын мāt порславес. Тув щәне Раиса Германовна Решетникова ялыс. Тав пыге урыл мәхумыт лялт потыртас. Ләвыс, маныр пыге эруптас, маныр вәруңкве кәсашас.

Яңк нәтнэ этпос 8 хөталэт 2024

тәлт хөнтлын мән минас. Тувыл воссыг акваювле ат ёхтыс... Порслым мātэт сәв этпос кисвес. 2025 тәлт мәнполь этпост ушта хөнтвес.

**Раиса Решетникова** пыге мēталит суссылтас, тувыл тох ләвыс:

– Ам пыгум урыл ләтың ләвуңкве таңхөгум. Саша мән тәгыл кәркамыг яныгмас. Тав юртанэ ёт акваг юртыңыщ олыс. Ишкола әстлас, тувыл Сургутский политехнический колледжит ханищтахтас. Рүт мәхумыт ёт акваг ёмщакв потыртас. Тав ёсал хәйтуңкве кәсашас, пыгыт ёт футболыл ёнгасас. Саша спорт сака эруптас, олме палыт акваг пустәгыл олыс. Ты коньпал мәшинат, тувыл компьютерыт щёпитас.

Музейт Александр Решетников рүтанэ олсыт. Тән сәвсыр пәвлытныл тув ёхталасыт, тувыл Александр урыл ләтың ләвсыт. Пуссын таве кәркамыг номияныл. Александр эще әги **Аня Куликова** стих ловиньтас.

Ты вәрмаль юи-өвыл порат мәхумыт акв күм суйтәл люльсыт. Тувыл хөнтлын мāt порслым мәхумыт кәстысаныл.

Галина ДУНАЕВА

# Мāнь пāвлытын ялантаңкве Эри

**К**āсың рүпитан мāt мāхум командировкан ялантэгыт ос тāнти рүпатаныл щирыл эрнэ тэлат вārёгыт. Тох музейт рүпитан хōтпат мāнь пāвлытын ялантэгыт, мāхум титыглэгыт ос суссылтан мāгсыл маснутыт, пормасыт атэгыт.

«Төрүм Маа» музейт рүпитан хōтпаг Вячеслав Кондин ос Анастасия Брусницина Хāльүс район Саранпāвылн ос Хōрыңпāвылн ялсбг. Саранпāвылт музей-колн, библиотекан ос нэ хōтпат щаквщин колнакын щалтсасбг. Та колт Евгения Вьюткина кўщаиг олы. Тав ань Центр ремесел колт рүпиты, мāньщи мир пēs йис вārмалит нэпакн хансыянэ, пōслыянэ ос Экват юнсахтуңкве акван-атыгылянэ.

**Вячеслав Юрьевич Кондин** ялме урыл тох потыртас:

– Саранпāвыл музейт рүпитан хōтпат эт потыртасум. Тот хум энтап ос сыпалиң касай хумус ёмщакв хансуңкве, манарыл вāрим олэгыт, та маныр – пуссын тāнанылн хўлтыгласум. Мāньлат нэт вāрим пормасыт сунсыгыляныл ос ат торгамтэгыт, манхурип йивныл вāрим, хумус ёргувес ос мōт вārмалит.

Любовь Стаканова эт

туи «Мāнь Ёсквет» рүпитан урыл потыртасмөн. Туитотпыгрищитёткатыл матыр-āti тах щаквщев. Тот ам тāнаныл ёнгынутыт ёргуңкве ханищтыяну, сāsныл касай сыпалит ос сāvсыр пормасыт вārев.

Анастасия Брусницина ос мāщтыр нэт эт хōнхатыглас. Тāн Евгения Вьюткина колн акванатхатыглэгыт, тот мāньлат нэт ос āгит юнсахтуңкве, йинсахтуңкве ханищтыяныл. Хўл сов тынтлэгыт, мāнь хурыгсовыт юнтэгыт. Тāнматахтāлювлехультум порат сāлы совныл тучаңыт юнтуңкве патсыт. Овлэт вильтсовыт, котыт тынтласыт, āгит ханищтасаныл. Тувыл хансат йинсыт, юнтсыт ос тувыл пуссын лōмтанэ акванолтыяныл. Ты сака тārвытың рүпата, ос нэ хōтпат пēs тучаң нупыл сунсым ёмщакв та юнтсаныл.

Анастасия ты коныпал пēs хумус мāньщи щирыл пүри вārвес, та урыл нэ хōтпат титыглас. Тāн



А.П. Брусницина ос Н.Н. Загайнова



Нэт щаквщёгыт

Агафья Алексеевна ос Василий Николаевич Вьюткиныг акван-минамөн урыл потыртасыт. Хумус мāньнэ хāйталаве, хотьют овлэт хāйталаңкве мины ос мōт пēs йис вārмалит. Ты экваг-ойкаг ань атпантем тāl аквёт олэг.

Ам тувыл акв хōтал Хōрыңпāвылн ялсум, тув Алексей Меровн тотыглавесум. Алексей Рудольфович такви ты пāвылт яныгмас, омагетяге колыт тот ўнлэгыт. Та пāвылт ань акв хōтпа олы, Евгений Тихонов. Тав тит лувыг оныщи, тэнатэн тыттыяге, айтыяге, туи пум вāри. Пāвыл щар тātлаг патыс, мāхум тув нас ўщлахтын хōталт манос туи хўл алыщлаңкве ёхталэгыт. Тālэ-тувёт Евгений

тактёт олы. Пāвылн свонитан мāгыс таксофон олы, таве щёпитаңкве Саранпāвылныл хум хōтпат ёхталэгыт. Мāнь телефонит тот ат рүпитэгыт, связь ос интернет āтим. Хōрыңпāвыл тāра мāшинал яласан лёңх ат вāраве, тōва порат хотьют снегоходыл туп ёхталы, тувыл та.

Вячеслав Юрьевич лātже щирыл, тāн, музейт рүпитан хōтпат, хотты мāнь пāвлытын ялантэгыт, пēs пормасыт пōслэгыт. Тувыл музейянылт кāсың тўяг семинарн атхатыглэгыт, тот пēs йис пормасыт щирыл ийльпиниг вārёгыт, ты щаквщин вārмаль акваг хот ул вос ёрувлахты.



А.Р. Меров ос В.Ю. Кондин

Галина КОНДИНА

## Тав Няхлаң павылт яныгмас

**Х**альүст блнэ мәныщи Эква Софья Семёновна Азисова тал котиль этпос 31 хөталэт 91 талэ төвлыс. Намхөталэ кастыл мән тав этэ хөнтхатыгласүв, потрамасүв. Софья Семёновна блупсатэ урыл мощ потыртас:

– Ам Хальүст сав тал блэгум, тыт Лёва пыгум ос Калерия агим яныгмасыг. Хөпсы агм пусмалтан пүльницат мән лөккарыг рүпитасум. Хунь пенсиян миннэ порам өхтыс, номсэгум, юн колсори вәрим блуңкве патэгум. Лөккар Эква Нина Николаевна Берсенёва ам нуплум лавыс: «Софья Семёновна, элалэ өс мощ рүпитэн, мән лөккар мощца, хөтютувн нөтавөв». Тувыл элалэ рүпитаңкве та хультсум, сатлов таланум төвлын мус рүпитасум.

**– Софья Семёновна, наң хотыл блэгын?**

– Алы Няхлаң павылт 1935 талт самын патсум, тот яныгмасум. Амти бпарищ намум Вынгилева. Каңк өсцум, наме Константин, тав өс Хальүст колтаглэ эт блыс. Атямөн савы үрнэ хум блыс, сәлыт янмалтас. Тувыл ань эрттам кулак, таимәгыс репрессия талыт порат порславес. Төнт ам иң мән блсум, атям ат номилум. Омам потырталыс, сәлыт пуссын колхоз нупыл нявлувөсыт, ат сәлыт туп хультуптавөсүв.

**– Школат хөт ханищтахтасын?**

– Өвлэт Алы Няхлаң павылт ханищтахтасум. Тот бовыл классыт школа рүпитас. Павыл яныг блыс. Элалэ Кульпасн тотыгавөсүв, тот ханищтахтасүв, интернатыт блсүв. Тэлы каникулыт порат омамен лувыңсуныл өхты. Туи ос ййвхәпыл өхты, ювле тупыл товөв, та порат

моторхәп хунь блыс.

Сатыт класс асламум юи-пәлт Салехард үсн минасум, тот Зооветеринарный техникумт үйхул пусмалтан лөккарыг нила тал ханищтахтасум.



Софья Семёновна Калерия агитэ ос Лёва пыге эт пөслым блы

Зоотехникыг рүпитаңкве Нящамвөдл павылн көтвөсум. Тот мощ рүпитасум, тувыл Хальүсн йисум, тыг блмыгтасум.

Хальүст Софья Семёновна хум вәрыс, наме Акрам Азисов, хатань хөтпа. Та порат Ханты-Мансийск үст кит тал мән лөккарыг ханищтахтын курсыт вәрвөсыт, тав тув минуңкве номылматас. Ойкатэ өс тав этэ минас. Ханты-Мансийск үст кит тал блсбг. Софья Семёновна алпыл ханищтахтас, этипалаг пүльницат колкан ловтым рүпитас. Акрам ос грузчыкыг патхатыглас. Ханты-Мансийск үст Лёва пыген самын патыс. Хунь Софья Семёновна ханищтахтын мәныл пөйтыс, тан ювле Хальүсн минасум. Нэ хөпсы агм пусмалтан пүльницан рүпитаңкве патхатас.



С.С. Азисова

Пыге Лев Акрамович тох потыртас:

– Омам ущты лавыс, ам Ханты-Мансийск үст самын патсум – лүпта этпос 27 хөталэт 1965 талт. Калерия эщум 1967 талт Хальүст самын патыс. Мән колув экспедиция нупыл блыс, ляпат школа үнлыс, мөн эщум эт тот ханищтахтасмөн. Омам өн-өтягмөн сав үйхул янмалтасыг – мисыт, лувыт, пүрщит, пәлят, щипкурөкыт. Туи пум вәрсүв, атям эт хул алыщласмөн.

Школа асламум юи-пәлт ам Днепропетровский область Кривой Рог үст гражданский авиация технический училищат хурум тал ханищтахтасум, 1983-1986 талыт порат. Тувыл Хальүсн йисум, тыт аэропорт колт техник по авиационному и радиоэлектронному

оборудованию тэла щипрыл аквхуйплов тал рүпитасум. Этыл Ягрим павылн инженерыг рүпитаңкве вөввөсум. Колтаглум эт тув та вәнтлысум. Хальүс авиотрядыт рүпитанэм мощөртын налыман талыг ты өмты.

Омамөн самын патум мән, Няхлаң павылн, мән акваг ялантасүв. Кульпас мус нәиңхәпыл миннэ, элалэ моторхәпыл тотавөв. Анөквкам такви бпарищ наме Таратова, рүт мәхманув ань савыңпәлэ Кульпаст блэгыт. Атям рүтанэ ос Тобольск үс нупыл блэгыт. Колтагланыл яныг блыс. Мән порат та өрн өс ялантәлсүв. Атямөн 2016 талт атимыг өмтыс.

Ам ань омам намхөталэ кастыл юв өхтысум. Ятил тының оматем янытлылум, тавөн сав өмас, сымың ләтың лавөгум! Омам акваг рүпитас – мәхум пусмалтас, үйхул янмалтас, пум вәрыс. Рүпататэ пәлыл акваг янытлавес, «Ветеран труда» намыл майвес.

Мән, мәныщи газета вәрнэ хөтпат, Софья Семёновна намхөталэт янытлылүв! Пустәгыл вос блы, нявраманән вос нөтаве, Нәй-Отыранән вос үргалаве!

Светлана  
РОМБАНДЕЕВА

# Мәщтыр нә ёт хонтхатыгласуь

**Х**анты-Мансийскат нәпак ловиньтан колт «Обь/Чай» нампа акван-атхатыглан вәрмаль блыгы. Та колт рүпитан нә Алла Иштимирова-Посохова нәпак хаснә мэхум, учёныит, мирн вәнә хөтпат, мәщтыр ос пёс йис вәрмалит вәнә нэт, хумыт тув вөвыгылянэ.

Рётың юсвой этпос 10 хөталэт нәпак ловиньтан колн Белоярский уст блнэ мәнщи нә Татьяна Ермиловна Тарасова, аги бпарищ наме Сангилева, тув ёхталас. Тав Кимкья-суй павылт самын патыс, яныгмас. Пёс йис порат атятэ рүтыт Сәңкитур павылныл олсыт, тох бпарищ намыл майвёсыт.

Мәщтырлаңкве тав сака вёрми, матыр-ати юнтуңкве пуссын хасы. Нә савсыр хонтхатыглапытн, суссылтапытн, ханищтапытн акваг вөвыглаве.

Нәпак ловиньтан колт Татьяна Ермиловна такви мәщтырлан тэланэ урыл потыртаc.

– Ам мәнщтагыл мәщтырлэгум, юн омам ну-пыл сунсым юнсхатуңкве патсум, сакныл хартуңкве школат ханищтахтасум. Ань мәнщи супыт, совьявәит, нуйсахит, тучаңыт юнтэгум. Сакныл пальсакыт, турлөпсыт ос мөт хорамың утыт хартэгум. Сәсныл, сәлы

сөвныл мәнщи пормасыт юнтэгум. Энтапыт, сәнсквәлгыт сагуңкве хәсэгум.

Ойкам хул алыщлаңкве акваг яланты, яныг сорт юв ке тоты, ам тәра сове хот-нуилум. Тамле сөвыл яныг тучаң юнтуңкве рөви.

Ам руц щирыл бс юнсхатэгум, мәнщ тор-лөмтыл савсыр пормасыт вәрэгум, ты тэла тох хаштәл ләтңыл намаим блы – «пэчворк». Спицал пәссат, носкит мөт хорамың маснудыт сагегум. Нярсов (ровдуга) ёт рүпитаңкве ос хәсэгум, хумус бюлптанкве эри, ёмащакв вәглум.

Белоярский районт ос Белоярский уст мәщтыр мэхум вәтихал акван-атхатыглэгыт ос халанылт ханищтахтэгыт. Ам тув бс акваг ялантэгум. Ханты-Мансийск уст «Төрүм Маа» музейн вөвыглавем, тот мэхум мәщтырлаңкве ханищтыяну.

Мәщтыр нә ань округт ёмащакв вәве, хөт-



Т.Е. Тарасова ныврамыт ёт щаквици

ати вөвыглаве. Тот тав мәнщи пёс йис вәрмалит урыл потырты, мэхум юнсхатуңкве, сакныл хартуңкве ханищтыянэ. Мөлтү тәл яныг таквс этпост тав Екатеринбург, тувыл Тюмень ос мөт усытын мәнщи вәрмалит урыл потыртаңкве ос мэхум ханищтаңкве ялыс. Ты элы-пәлт туяг Москва усн «Сокровища Севера» суссылтапын вөвыглавес. Юнтум пормасанэ мәгсыл тот сака янытлавес.

Нә ныврамыт ёт вәтихал хонтхатыглы, манхурип мұтрат мәнщит бньщегыт, та урыл потырты.

Татьяна Ермиловна эргуңкве бс сака хасы. Ань тав Белоярский уст ханты нэт ёт «Увас хурамыт» нампа ансамблит эрги. Ты коньпал мәнщи

ләтңыл стихыт ловиньты. Хонтхатыглап блум порат тав Хулюмсунт павылт блнэ эква Мария Тихоновна Двинянинова «Уринэква» руц ос мәнщи ләтңыл хансум стихе ловиньтастэ.

Хонтхатыглап оигпаме элы-пәлт тув ёхталам нэкет мәнщи пуңктөр юнтуңкве ханищтасанэ.

Мөлтү тәл яныг таквс этпост Татьяна Ермиловна 60 тәлэ төвлыс. Тав мұтраң, мәщтыр хөтпаг блы. Сәв тэла вәг, сәв рупата вәруңкве хасы. Аква щирыл кәркамыг вос мәщтырлы ос мәнщи мұтрат урыл вос потырты. Агирищит, пыгрищит ёт вос хонтхатыгләлы, тәнаныл вос ханищтыянэ. Пус кәт, пус ләгыл!

**Людмила ТЕТКИНА**



Төр йинэгыт



Акван-атхатыглам нэт

## Тав округ мирн номуңкве патаве

Рётың юсвой этпос 15 хөталэт Ханты-Мансийск үст Мария Кузьминична Волдина аitimыг ёмтыс. «Ханты ясанг» ос «Лүймә сэрипос» газетаг вәрнэ колувн округ Дума пәлыл тамле ләтың кётвес:

– Мән, округ Дума депутаты, **Мария Кузьминична Волдина** нъяв-раманән ос рүтанән сәлитан ләтың ләвёв.

Мария Кузьминична хөтпа нупыл сымың элумхөлас олыс, вёщкат, мўтраң эква. Тав олме палытыл сәв ёмас, эрнэ тәлат вәрыс – нэпакыт хансыс, журналистыг рүпитас, нъяврамыт ос мәнйлат мәхум ханищтас, мирн нётнэ сәвсыр тәлат вәрыс.

Мария Кузьминична ханты колтәглыт самын патыс – щән ләтҗе, лүймә соссa мирыт пёс

йис наканыл, округт олнэ мәхум янытласанэ. Кос мән мәхум, кос яныгхөтпат ёт потрамаңкве хәсыс, такви мәтэурыл эрпыңыщ потыртас.

Тав ляпатэт мәхум Югра мят олнэ мирыт нупыл ёмас номтыл сунсуңкве, тыт олнэ мирыт янытлаңкве ханищтахтасыт.

Олме сыс вәрыглам тәланэ мәгыс сәв яныг намыл майлувес «Заслуженный работник культуры России», «Почётный гражданин Ханты-Мансийского автономного округа – Югры», ос мāk яныг нам Мария Кузьминична мәгыс таи – тав лүймәт олнэ мирн янытлавес.

Кәсыңув таве сымың, вёщкат ос мўтраң элумхөласыг номуңкве патытэ.



Мария Кузьминична овылтыт посуң номтыт тав хансыглам нэпаканэ, стиханэт ос эрганэт хультэгыт, округ мирн тав номуңкве патаве. Намың-суиң хөтпав олуп-

сатэ хосыт мәхум вәңкве патэгыт, хумус рүпитанкве эри, ёмас тәлат вәрим олуккве эри.

Округ Дума кўщай хум  
Б.С. Хохряков

## Эква сәв ёмас тәлат вәрыс

Ты этпос 15 хөталэт округт олум соссa хөтпав **Мария Кузьминична Волдина** аitimыг ёмтыс, вәт сәграпнал этпост 90 тәлэ төвлынув.

Мария Кузьминична вәт сәграпнал этпос 28 хөталэт 1936 тәлт Белоярский район Юильск пәвыл ляпат Курьёх я вәтат самын патыс.

Колтәгыл мәхманэ сәлы ўрим яласасыт. Оматэ Варвара Ивановна, атятэ Кузьма Николаевич Вагатов, тән китхуйплов нъяв-раманән самын патсыт, Мария щар яныг агитән.

Мария Кузьминична хөт тәлэ төвлуме порат, 1943 тәлт, Юильск пәвыл школан вуйвес. Тот нилыт класс мус ханищтахтас, тувыл Касум пәвылт олнэ

школа-интернатын тотвес. Сәтыт класс әстламе юи-пәлт Ханты-Мансийск ўсн минас, педучилищат ханищтахтас.

1956-1965 тәлытт Касум пәвыл школат нъяврамыт ханищтым рүпитас, интернат кўщаиг олыс. Касумт хум вәрыс, аги-пыг янмалтасыт.

Ётыл Ленинград ўст олнэ А.И. Герцен нампa институт әстлас. 1974 тәлт Ханты-Мансийск ўст «Ленин пант хуват» (Ленин лёңхе щирыл) газета редакторыг патувес. Радио колт ханты ләтңыл передачат вәруңкве алымас.

Мария Кузьминична вәт тәл «Ханты ясанг» ос «Лүймә сэрипос» газетаг вәрнэ колт кўщаиг рүпи-

тас. Тыхал нэпакыт тәратас, ханты ос рущ ләтңыл потрыт, мбйтыт, стихыт ос эргыт хансыс.

Тав «Заслуженный работник культуры России» намыл майлувес, «Почётный гражданин Ханты-Мансийского автономного округа – Югры», член Союза писателей России, член Союза журналистов России.

«Ешак най» колтәгыл ансамбль вәрме мәгыс 2018 тәлт Москва ўст, П.И. Чайковский колнакёт, «Традиционная народная культура» номинацият эква «Душа России» нампa мәгылн тагатан пёсыл майвес.

Мария Кузьминична олме палытыл такви ләтҗе, рүт мәхманэ, лүймә

мирыт эруптасанэ, янытласанэ. Ханты ос рущ ләтңыг коныпал, саран ос мәнйщи ләтңыл потыртас.

Ханты-Мансийск ўст сәвсыр хөнтхатыглапытн, школатын ос нъяврам садикытн аква вөвиньтәлвес, округ соссa мәхум олупсаныл урыл потыртас. Россия янытыл финноугор мирыт палт ялантас, мөт хөн мят олыс.

Мән Мария Кузьминична Волдина кәстылүв, акваг номуңкве патылүв. Нъявраманән, апыгрищанән, рүт мәхманән сәлитан ләтың ләвёв.

«Ханты ясанг» ос  
«Лүймә сэрипос» газетаг  
вәрнэ колт рүпитан  
хөтпат

# Йис мāt олнэ сossa мāхум нĕтавет

**М**олты тал округувт Когалым үст сossa мāхум сāvсыр мāныл акван-атхатыгласыт. Тонт ты сапрāнин Ямало-Ненецкий округныл сossa мāхум ёт рупитан кўщай хум Эдуард Хабэчевич Яунгад ёхталас. Тāн мāнылт олнэ сossa мир манхурип нĕтмилыл вāравет, тав тот потыртас.



Э. Яунгад

Ань сossa мир тārвит вāрмаляныл урыл потрыт мāн вāтихал хансĕв. Мāхум тĕланыл мўсхалыг щĕпитан мāгыс сāv эрнэ сākкон пирмайтым олы. Ямало-Ненецкий округт сossa мирн нĕтмил вārнэ мāгыс сāv эрнэ програм-мат рупитĕгыт. Ты тĕлат щирыл атпан сōтыра сāvит мāхум нĕтмилыл вāравет.

Юи-ōвыл щĕс пере-пись олум порат, Ямало-Ненецкий округт налы-ман нупыл хōтахкем сōтыра сāvит ёрн, лов сōтыра сāvиткем ханты ос кит сōтыра сāvит сель-куп мāхум олĕгыт. Ты мāхумныл акв охсатĕ хōт-пат йис мāt тāнки рупата вāрим олĕгыт. Сāлы ўрнэ, вōраян ос хўл алыщлан общинат йис олупсаныл, олнэ-хўлнэ наканыл

элаль тотнэ мāгыс акваг нĕтавет.

Ты коныпал тāн округ-ганылт «Ямал потомкам» нампa сossa мирн нĕтмил вārнэ ассоциация рупи-ты. Ты тĕла хосыт йис мāt олнэ мāхум пусмалтан, ханищтахтын вāрмалит ос мōт тĕлат щирыл нĕта-вет.

Йис мāt нĕлолов эргын ос ййквнэ ёнгын колыт олĕгыт. Тāн ялпың хōта-лыт олыглан порат, кāсыңĕмт эргим ос ййквим мўйлĕгыт. Пĕс йис олуп-саныл ул вос ёрувлахтас ос элаль акваг вос тотвес, ты вāрмаль тот ёмщакв ўргалаве.

Тувыл йис мāt хўрум ремĕсла кол,нилахуйпов музей кол рупиты. Тот мўй хōтпатн акван-атым пĕс пормасыт суссылтавет.

Ты йис мāt сossa олупса ос олнэ-хўлнэ тĕлат урыл мирн потыртаве. Хумус пĕс порат мāхум вōрая-сыт, хўл алыщласыт ос сāлыт ўрсыт, манхурип маснутыл масхатасыт, манхурип рупата вārсыт, ты урыл тот ты тāра-пат-туңкве рōви. Ты колытн пўмщалахтуңкве кāсың хōтпа ёхталаңкве вĕрми.

Кўщай хум лāvме щир-ыл, тунрат мā-вōй ос газ нōх-виве. Ос сossa мирыт халт мāk та мāt шар сāv сāлы оныщаве. Тот сāлы тĕпың мāt ул вос пāнжувĕсыт, эколог хōт-пат Ямал мā-витэ ураль-таңкве вāтихал ялантĕ-гыт. Тунра мā сыстамыг оныщаве.

Хоты пāвылт сāvың-пālэ сossa мāхум олĕгыт, тот йильпи культура колыт ўнттавет. Госу-дарство пāлыл пуссын

аквĕт сātсāt арыгтем сāvит Ямал мā пĕс йис нак элаль тотнэ колыт манос āмпарыт ўргалым оныщавет. Тыгыл яныгсāt кит сossa хōтпа тāнки мāнанылт олĕгыт. Хўрум-сāt арыгтем пўрлахтын ялпың мāt нĕпакн хасвĕ-сыт, пōх хōтпат тув ат тārтавет.

Ямалт йис мāt олнэ сossa мāхум, тāн писалъ общнэ вāрмалын ханищтахтын мāгыс, миннэ лĕңх ос олнэ кол мāгыс «Ямал потомкам» ассоциация пāлыл компенсация ол-ныл ойтавет. Ты коныпал мā-вōй нōх-винэ мāхум кĕрлĕңх ос машинал яла-сан лĕңхыт ўлтта сāлыт вāнтлын лĕңхыт вārĕгыт ос мōт сāvсыр тĕлат щир-ыл сossa мāхумн нĕтĕ-гыт.

**Николай МЕРОВ**

Лүймә сәрипос  
(Северная заря)  
№ 4 (1358), 26.02.2026

Соучредители  
Дума, Правительство  
ХМАО – Югры

Издатель  
Департамент внутренней  
политики  
ХМАО – Югры

Редакция  
ВРИО главного редактора -  
**Рагимова Н.В.**  
Телефон (3467) 33-17-52 (д 502)

Заместитель гл.редактора –  
**Кондина Г.Р.**  
Телефон (3467) 33-17-52 (д 501)

Ответственный секретарь –  
**Ромбандеева С.М.**  
Телефон (3467) 33-17-52 (д 507)

Адрес редакции и издателя:  
628011, г.Ханты-Мансийск,  
ул.Комсомольская, 31  
тел./факс (3467) 33-17-52 (д 510)

E-mail: [gazeta@khanty-yasang.ru](mailto:gazeta@khanty-yasang.ru)  
Газета размещена на сайте  
[www.khanty-yasang.ru](http://www.khanty-yasang.ru)

Отпечатано:  
ООО «Печатный Мир»  
г. Сургут»,  
ул. Маяковского, д. 14.

Индексы 04399, 54399  
Тираж 1710 экз.  
Заказ 199

Цена свободная  
Мнение авторов  
публикаций не  
обязательно отражает  
точку зрения редакции.

Газета зарегистрирована  
Управлением Федеральной

службы по надзору  
в сфере связи,  
информационных  
технологий и массовых  
коммуникаций  
по Тюменской области,  
ХМАО-Югре и ЯНАО.

Свидетельство  
о регистрации  
ПИ №ТУ 72-00795  
от 23 января 2013 г.

**12+**